

Միւրիական ծովեղերքը, այլ եւ Ալեքսանտրե-
տը, մանաւանդ եթէ Զմիւռնիան բաժին հան-
ուի Յունաստանին» (էջ 113)* :

Ինչպէս թէ՛ յետոյ աւելի եւս պարզ կը
տեսնենք, եթէ՛ Ռուսաստանը վերելց էր
պատրաստուում յօշոտել Հայաստանի մարմի-
նը, Ֆրանսան նոյն մարմինը ձգտում էր լա-
փել վարկի :

1915 թ. Մարտ 1-14-ին Պետերբուրգի
Ֆրանսական դեսպան Պալէոլոգը հեռագրում
է Սազոնովին, որը այդ ժամանակ գտնուում էր
ուսգմաճակատում, ցարի մօտ .

«Երախտապարտ կը լինէի Զերդ գերադան-
թեան, եթէ հաճէիք հազորդել ի գիտութիւն,
նորին կայսերական մեծութեան, որ հանրա-
պետութեան կառավարութիւնը, Թիւրքիային
ներկայացուելիք հաշտութեան պայմանները
քննելուց յետոյ, կամենում է գրաւել Սիւրի-
ան, մէջը առնելով Ալեքսանտրեաի ծոցի շըր-
ջանը, եւ Կիլիկիան մինչեւ Տաւրոսի լեռնա-
շղթան : Երջանիկ կը լինէի անյապաղ վստա-
հացնել իմ կառավարութիւնը, որ նորին կայ-
սերական մեծութիւնը համաձայն է նոյն բաղ-
ձանքին» (էջ 127) :

Այս առթիւ, արտաքին գործոց նախարարի
օգնական Ա. Ներատովը խորհուրդ է տալիս
Սազոնովին, թէ՛ «իւր կարծիքով անհրաժեշտ
է զիտել տալ Ֆրանսացիներին, որ հայերը,
մեր տեղեկութիւններով, երազում են հայերով
ընտելուած Մերսինի եւ շրջանի մասին, եւ որ
այդ վայրերը Ֆրանսական պահանջներին մէջ
մտցնելը կարող է հայերի մէջ առաջ բերել հի-
ասթափում Ֆրանսայի նկատմամբ : Պէտք է
բացատրենք Ֆրանսացիներին, որ մենք հրա-
ւիրում ենք իրենց ուշադրութիւնը այս բանի
վրայ այն նպատակով, որ ապագային չմեղա-
դրեն մեզ թէ՛ ժամանակին տեղեակ չենք դար-
ձրել Հայկական բաղձանքների մասին» :

Իբրեւ եզրակացութիւն, սակայն, Ներա-
տովը կարծում է, թէ՛ «պէտք է յայտարարել
Ֆրանսացիներին, որ եթէ Ֆրանսան իրեն հա-
մար նկատէ կարեւոր ու անհրաժեշտ Մերսինի

կցումը, մենք, ի հարկէ, արգելք չենք հանդի-
սանայ» (128) :

«Հայկական բաղձանքները», հարկաւ,
Ֆրանսայի համար կարեւոր հանգամանք չէ-
ին, եւ Մարտ 3-16-ին Պալէոլոգը շտապում է
գլխաւոր հրամանատարի կայանը, Յարի մօտ,
եւ յանուն իր կառավարութեան խնդրում է
Ռուսաստանի հաւանութիւնը, որ Ֆրանսան
գրաւէ Սիւրիան ու Կիլիկիան : Այդ հաւանու-
թիւնը ցարը տալիս է՝ պայման դնելով, որ
Պաղեստինը Սիւրիայի մէջ չմտնի եւ «Սուրբ
Վայրերի» համար ստեղծուի առանձին վիճակ :
Ֆրանսան, ի հարկէ, չի պնդում Պաղեստինի
վրայ, թէ՛ եւ Ֆրանսական արտաքին գործոց
նախարար Գելլուսէն դիւանագիտօրէն պա-
տասխանում է, թէ՛ «Սուրբ Վայրերի հարցը
պահանջում է առանձին եւ աւելի ուշադիր
քննութիւն» (130) :

* * *

Այսպէս, ուրեմն, տակաւին 1915 թ. Մար-
տին Ֆրանսայի համար հաստատ վճիռ էր՝
գրաւել Կիլիկիան, մինչեւ «Տաւրոսի լեռնա-
շղթան», այսինքն՝ աժդող Մալաթիայի շըր-
ջանն ու Խարբերդի էլ մի մասը : Իսկ նոյն մի-
ջոցին Պողոս Նուպարի պատուիրակութիւնը
Փարիզում եւ Ազգ. Բիւրօն Թիֆլիսում «վեց
վիլայէթների եւ նրանց անբաժան մաս Կիլի-
կիայի» պահանջն էին որոճում, եւ Յ. Քաջազ-
նունին, Ազգ. Բիւրոյի յանձնարարութեամբ,
վեց վիլայէթների ու Կիլիկիայի ապագայ քա-
ղաքական կազմակերպութեան ծրագիրն էր
մշակում . . .

Հայկական քաղաքական շրջանները աշ-
խատում են ամէն դնով յաջողացնել Թիւրքա-
հայաստանի ինքնավարութեան ծրագիրը՝ ծո-
վից ծով սահմաններով : Այդ ուղղութեամբ
տենդոտ գործունէութիւն է ցոյց տրուում Փա-
րիզում ու Պետերբուրգում՝ առաջինում Պօ-
ղոս փաշա Նուպարը իր շուրջը ունենալով գա-
նազան հոսանքներ Ներկայացուցիչներին,
վերջինում՝ Պետերբուրգի Հայկական Կոմի-
տէն եւ Ազգային Բիւրոյի մարդիկ, որոնք
կապ էին պահում արտաքին գործոց նախա-
րարութեան հետ :

Ապրիլ 4-17-ին Ներատովը հեռագրում է
Լոնտոնի եւ Փարիզի դեսպաններին .

*) Փակագծի մէջ նշանակուած են «Ասիա-
կան Թիւրքիայի բաժանումը» գրքի այն էջերը,
որտեղից առնուած են վաւերագրերը :